

797. ԽԱՉԲԱՐ. վերին կտորը, ընկած զանգակատան փլատակների մեջ, քիվին և խո-
րանում, 3 տող.

ՆՇԱՆԴ ԱՅ ԲԱՐԵՒԱԿ-
Ս ԼԵՐ ՊԱՂՈՆ՝ ԷՍՆԱԹԱԻՓԻՆ:
ԹՎԻՆ՝ ՉԽԸ (1299):

798. ԽԱՉԲԱՐ. թևավոր, Զոբայրավանքի գլխավոր խմբից հյուսիս, Չորրորդ եկեղեցի
տանող ոտնուղու եզրին, հորդաբուխ աղբյուրների մոտ.

Ի ԹՎԻՆ՝ Ա ՉԾԲ (1303):

Ծանոթ. Արձանագրությունը սուրբ նշանի բարձր պատվանդանի վրա է, չորս տող,
եղծված ու հագիվ նշմարելի, որը հնարավոր չի եղել կարդալ: Թևավորի առաջ կա 4
սալատապան՝ անհիշատակագիր:

Դ Ս Ե Ղ

Մշակութային ժառանգության արժեքներով հարուստ այս գյուղի հին անունն ավանդ-
ված չէ, իսկ Դսեղը ժԲ դարից ավելի վաղ չէ, և այն, թերևս, ինչպես նկատել է Ջալալյան-
ցը, նախապես կոչվել է Դրսեղ, Մամիկոնյանների ժառանգական կալվածքներից՝ Տայքից
հեռու, դուրս, դրսում եղավ իմաստը (եթե ոչ Դարսեղ): Նույն կարծիքը կրկնել է Էփրիկյանը:

Գյուղի տարածքում կան մ.թ.ա. II հազ. մինչև ժԵ դ. բազմաթիվ հուշարձաններ: Դրանց
թվում կարևորվում են Տգրկածովի և Դիտի ամրոցների ավերակները, վանական համա-
լիրները, եկեղեցիները, մատուռները, գեղահորաչ կոթողներն ու խաչքարերը:

Դսեղը հանրահայտ դարձավ Մամիկոնյան նախարարական տան շնորհիվ: Հերոսա-
կան անցյալով Մամիկոնյանների առաջին ներկայացուցիչն այս կողմերում Աշոտ մարզ-
պանն էր, որը Կյուրիկե Բ թագավորի հրամանով 1050 թ. կառուցեց Վարդաբլուր գյուղի
ամրոցի ապարանքը: Նրանք նշանակալի մասնակցություն ցուցաբերեցին սելջուկների
դեմ մղվող ազատագրական պատերազմներում՝ արժանանալով Ջաքարյանների հովա-
նավորությանը, նաև ձեռք բերելով ընդարձակ տիրույթներ: Աշոտի հաջորդ Համազասպ
մարզպանից սկսած տոհմը կոչվում է Համազասպյան: Նրանցից նշանավոր էր Սարգիս
զորապետը, որը սպանվել է 1201 թ. և թաղվել Սանահնի վանքում:

Հասարակական, պետական նոր միջավայրում, տնտեսական վերելքի պայմանե-
րում Մարծպան Համազասպյանի և նրա որդիներ Ասլանբեկի, Գրիգորի, Սարգսի,
Ամիրայի, եղբոր՝ Սմբատի և նրա որդիներ Համլիկի ու Սաղունի ժամանակներում տոհմը
հասավ հզորացման բարձրակետին, ժԳ դ. առաջին կեսում ավարտվեցին Բարձրաքաչի
ու Քառասնիցի շինարարական աշխատանքները, գյուղում կառուցեցին ապարանք ու
եկեղեցի: Ջաքարյանների գերակայությամբ, Կյուրիկյանների, Վաչուտյանների, Պոռչ-
յանների, Արծրունիների համագործակցությամբ Դսեղի Համազասպյան-Մամիկոնյան-
ները արժանավայել դիրք գրավեցին երկրում, նրանց կալվածքներն ընդգրկում էին Դե-
բեդի աջակողմյան վտակներ Մարց և Ալարեքս գետակների անտառապատ ծորահո-
վիտներն ու արգավանդ դաշտերը՝ թեև կալվածքներ ունեին և այլուր (Կոտայք, Ուրծ,
Խրամ): Տոհմի հեքը շարունակվեց մինչև դարավերջ, իսկ այնուհետև զրկվեց երբեմնի
փառքից ու հզորությունից: Մատենագրական-վիմագրական աղբյուրների հիման վրա
Ա. Շահինյանը շուրջ 40 տարի առաջ կազմել է Համազասպյան-Մամիկոնյան տան ճյու-
ղագրությունը («Լրաբեր», 1963, N 3, էջ 84-93), որտեղ ներկայացված է տոհմի 6 սե-

րունդ: Նոր տվյալները հնարավորություն են ընձեռում լրացնելու այս արգասավոր նախարարական տան յագմաճյուղ տոհմագրությունը՝ այն հասցնելով 12 սերնդի՝ շուրջ 400 տարվա ընթացքում: Սակայն այս դեպքում ևս այն հեռու է ամբողջական պատկերը տալուց: Սկզբնաղբյուրներում քանիցս հիշատակվում են Սարգիս, Հասան, Մարծպան, Մամիկոն, Վարդան և այլ Մամիկոնյաններ, որոնց փոխկապերը չեն պարզվում, և այս ուղղությամբ պետք է լուրջ հետազոտություններ կատարվեն:

Իսկ Դսեղում շարունակվում էր կյանքը, գործում էին հոգևոր կենտրոնները: 1652 թ. Սարգիս արքեպիսկոպոսի առաջնորդության ժամանակ, Թումանի որդի Սարգիս քահանան նորոգում է մի «Ավետարան»՝ «ի տանս *Տաշրու*, ի յերկիրս *Լոռու*... ի դուռն Ս. Լուսաւորչին, ի գիւղաքաղաքն *Դսեղու*»:⁷⁵

ԲԱՐՁՐԱՔԱՇԻ ՎԱՆՔ

Վանքի անվան կապակցությամբ Հ. Ոսկյանը գրում է. «Բարձրաքաշ անունը կամ յորջորջանքը, որ կը մնայ մեկնութեան կարօտ – մի՞թէ Բարձրէն տեսնուող եւ իրեն քաշող թէ սրտերը դէպի վեր ու բարձր տանող ու քաշող»,⁷⁶ որով փորձում է կապել երկնային ուժերի՝ աստծո հետ:

Թերևս տարակուսանքի հարկ չկա. Բարձրաքաշ է կոչվել գյուղի նկատմամբ ունեցած դիրքի պատճառով. հարթավայրից ցած, քաշ, ներքև՝ դեռևս ժ դ. կառուցված եկեղեցու տեղը մատնանշելու ձգտումով: Բարձրաքաշը դարձել է տեղանուն:

Հսմազասայան-Մամիկոնյանների ձեռնարկած ամենանշանավոր շինարարական գործը, անշուշտ, Բարձրաքաշի սուրբ Գրիգոր վանքի կառուցումն էր, որը դարձավ երկրի հոգևոր-մշակութային կարևոր կենտրոններից մեկը ու տոհմական դամբարան՝ թեկուզ ցայժմ հայտնի չէ, թե նրանցից ով է թաղվել այնտեղ:

Վիմագիր արձանագրություններում և ձեռագրաց հիշատակարաններում հոգևոր այս կենտրոնը կրում է *վանք, սուրբ ուխտ, տուն, Բարձրաքաշ, Բարձրաքաշի սուրբ ուխտ և սքանչելագործ սուրբ Գրիգոր*,⁷⁷ *Բարձրաքաշի սուրբ Գրիգոր վանք* անունները:

Բարձրաքաշի վանքը հիմնարկվել է Բագրատունյաց թագավորության ժամանակ՝ չնայած այդ մասին պատմական տեղեկություններ չկան մեր ձեռքի տակ: Ելնելով համալիրի հյուսիսային միանավ սրահի ճարտարապետաշինարարական յուրահատկութուններից (հատկապես բեմին կից երկարավուն ուղղանկյուն խորանները), այն կարելի է վերագրել Թ-Ժ դարերին:⁷⁸ Բայց իբրև վանական հաստատություն կառուցապատվել-ամբողջացվել և կանոնավոր գործունեություն է ծավալել Մամիկոնյանների իշխանության ընթացքում, ու այդ ժամանակ էլ հոգևոր-մշակութային այս կենտրոնին շնորհվել է *սքանչելագործ սուրբ Գրիգոր* անունը՝ մեծ քահանայապետի մասունքներն այնտեղ ամփոփելու պատրվակով:⁷⁹

⁷⁵ Հայերեն ձեռագրերի ժէ դարի հիշատակարաններ, հ. Գ., էջ 491:

⁷⁶ Հ. Ոսկյան, Գուգարքի վանքերը, էջ 18:

⁷⁷ Վերջին անունն է կրում նաև գյուղամիջյան քանիցս վերաշինված եկեղեցին:

⁷⁸ Դսեղի ճարտարապետական կոթողների նկարագրությունն ու վերլուծությունը տրված է Գ. Շախկյանի «Լոռի» աշխատության 36-41 էջերում: Լալայանը շփոթել է այս եկեղեցին Ս. Հարությունի հետ, և ժամանակը, հայտնի չէ ինչից ելնելով, համարել է ՌԾԴ – 1205 թ. (Ազգ. հանդ. II-VIII, էջ 423):

⁷⁹ Ձեռագրաց հիշատակարանների գրիչները Լուսավորչին մեծարում են «Սքանչելագործ սուրբ Գրիգոր» հորջորջումով, որին չպիտի շփոթել այդ պատվանունին արժանացած քրիստոնյա առաջին հայրերից մեկի՝ Գրիգոր Սքանչելագործ Նյուսացու (Նիկիա) հետ: